

四庫全書

子部

欽定四庫全書

冊府元龜卷一百十二

宋 王欽若等 撰

帝王部

巡幸第一

易曰風行地上觀先王以省方觀民設教書曰五載一
巡狩羣后肆朝蔡邕云天子車駕所至民臣以為徼幸
故謂之幸漢制曰巡狩之制以宣聲教如此則王者巡
幸之禮有自來矣是故省風俗見高年所過必給復所

至必赦宥出警入蹕清道而郊駕春遊秋豫從容以展
義必有節制是謂禮經管子曰先王之遊春出原農事
之不本秋出補人之不足從樂而不反者謂之荒夏諺
曰吾王不遊吾何以休吾王不豫吾何以助蓋豫行教
化勉民事而已豈徒事車轍馬跡以遍天下者乎

黃帝南巡狩至於東濱澤

舜既陟帝位歲二月東巡狩至于岱宗柴

諸侯為天子
守土故稱守

巡行之既班瑞之明月乃順春東巡
岱宗泰山四岳所宗燔柴祭天告至

望秩于山川

東岳
諸侯

境內名山大川如其秩次望祭之謂五岳肆覲東后遂牲禮視三公四瀆視諸侯其餘視百子男

東方之國君

協時月正日同律度量衡

合四時氣節月之小大日之甲乙使齊一

也律法制及尺寸斛斗斤兩皆均同

修五禮五玉

修吉凶賓軍嘉之禮三等諸侯執其玉

三

帛二生一死贄

三帛諸侯世子執纁公之孤執玄附庸之君執黃二生卿執羔大夫執鴈一死

士執雉玉帛生死所以為贄以見之

如五器卒乃復

卒終復還器謂圭璧如五器禮終則還之

玉帛生死則否

五月南巡狩至于南岳如岱禮

南岳衡山自東岳南巡五月至

八月西巡狩至於西岳如初

西岳華山初謂岱宗

十有一月朔巡

狩至于北岳如西禮

北岳恒山

歸格于藝祖用特

巡守四岳然後歸告

至文祖之廟藝文也
言祖則考特一牛

五載一巡狩羣后四朝
各會朝于方岳之下

凡四處故曰四時將說敷奏之事故申
言之堯舜同道舜治則然堯又可知

敷奏以言明試

以功車服以庸

敷陳奏進也諸侯四時各使陳進治禮之音明試其言以要其功或則賜車服

以表顯其能用

三十九年南巡狩

臣欽若等曰凡巡幸不書年月及無還宮月日者皆史闕

夏禹十六年東巡狩會諸侯江南計功

一大禹至大越上苗山大會計

爵有德封有功因名苗山曰會稽

周成王撫萬邦巡侯甸

即政撫萬國巡行天下侯服甸服也

四征弗庭綏

厥兆民

四面征討諸侯之不直者所以安兆民事具帝王親征門

穆王時造父取驥之乘匹與桃林盜驪驂騮綠耳獻之王使造父御西巡狩

共王二年遊於涇上

漢高帝初為漢王二年十月如陝鎮撫關外父老

六年十月人告楚王信反帝用陳平計乃偽遊雲夢十二月會諸侯王于陳楚王迎謁因執之

七年夏四月行如雒陽

如往也

八年三月行如雒陽九月行自雒陽至

九年十二月行如雒陽二月行自雒陽至

十二年破淮南王布軍還過沛留置酒沛宮召故人
父老子弟佐酒發沛中兒得百二十人教之歌酒酣帝
擊筑自歌曰大風起兮雲飛揚威加海內兮歸故鄉安
得猛士兮守四方令兒皆和習之帝乃起舞慷慨傷懷
泣數行下謂沛父兄曰遊子悲故鄉吾雖都關中萬歲
之後吾魂魄猶思沛且朕自沛公以誅暴逆遂有天下

其以沛為朕湯沐邑復其民世世無有所與沛父老諸
母故人日樂飲極歡道舊故為笑樂十餘日帝欲去沛
父兄固請帝曰吾人眾多父兄不能給乃去沛中空縣
皆之邑西獻帝留上張飲三日

惠帝時出遊離宮奉常叔孫通曰古者有春嘗果方今
櫻桃熟可獻願陛下出因取櫻桃獻宗廟帝許之

文帝三年五月匈奴入居北地河南為寇帝幸甘泉

邕蔡

云天子車駕所至民臣以為僥倖故曰幸見令長三老
官屬親臨軒作樂賜以食帛越巾佩帶之屬民爵有級

數或賜田租之半故因謂之幸也甘泉在雲陽本秦林光宮

自甘泉之高奴

高奴上郡之縣

因幸太原見故羣臣皆賜之舉功行賞諸民里賜牛酒
復晉陽中都民三歲租留游太原十餘日七月自太原
至長安

十年冬行幸甘泉

十一年十一月行幸代正月自代還

十五年四月幸雍始郊見五帝

後元二年夏行幸棧陽宮

三年二月行幸代

四年五月行幸雍

五年正月行幸隴西三月行幸雍七月行幸代

武帝元光二年十月行幸雍祠五畤

六年六月行幸雍

元朔四年冬行幸甘泉

元狩元年十月行幸雍祠五畤

二年冬行幸雍祠五畤

元鼎四年十月行幸雍祠五時賜民爵一級百戶牛酒

行自夏陽東幸汾陰

夏陽馮翊之縣也汾陰屬河東汾音扶云切

十一月甲

子立后土祠於汾陰雎上禮畢行幸滎陽還至雒陽

五年十月行幸雍祠五時遂踰隴

即今之隴山

登空同

山名

臨祖厲河而還

六年十月行東將幸緱氏至左邑桐鄉聞南越破改為聞喜縣春至汲新中鄉得呂嘉首改為獲嘉縣

元封元年十月自雲陽北歷上郡西河五原出長城北

登單于臺至朔方臨北河勒兵十八萬騎還祠黃帝於

橋山

在上郡周陽縣

廼歸甘泉正月行幸緱氏用事華山至于

中嶽遂東巡海上四月還登封泰山復東巡海上至碣石自遼西歷北邊九原歸于甘泉

二年十月行幸雍祠五畤春幸緱氏遂至東萊四月還祠泰山至瓠子臨決河

四年十月行幸雍祠五畤通回中道

回中在安定高平有險阻蕭關在其

北自回中通遂北出蕭關

蕭關在安定朝那縣

歷獨鹿鳴澤

獨鹿山名

也鳴澤澤名也皆在涿郡道縣北界也

自代而還幸河東三月祠后土幸

中都宮

五年冬行南巡狩至于盛唐

在南郡

望祀虞舜于九嶷登

瀟天柱山

在今舒州

自尋陽浮江親射蛟江中獲之舳艫千

里薄樅陽而出作盛唐樅陽之歌遂北至琅邪並海所

過禮祠其名山大川三月增封泰山還幸甘泉郊泰畤

六年冬行幸回中

回中在安定蕭關在其北

三月行幸河東祠后土

太初元年十月行幸泰山十二月禮高里祠后土東臨

勃海望祠蓬萊山春還受計于甘泉八月行幸安定

二年三月行幸河東祠后土

三年正月行幸東巡海上四月還修封泰山禪石閣

石閣

山在泰山山下趾南方方士言仙人閭

四年冬行幸回中

天漢元年正月行幸甘泉郊泰時三月幸河東祠后土
三年三月行幸泰山修封祠明堂因受計還幸北地祠

常山瘞玄玉

太始二年正月行幸回中

三年二月行幸東海獲赤雁作朱雁之歌幸琅邪禮日
成山登之罘浮大海山稱萬歲

四年三月行幸泰山四月幸不其祠神人于交門宮五
月還幸建章宮大置酒十二月行幸雍祠五時西至安
定北地

征和元年正月還行幸建章宮

三年正月行幸雍至安定

四年正月行幸東萊臨大海三月帝耕于鉅定

齊國還縣

幸泰山修封六月還幸甘泉

後元元年正月行幸甘泉郊泰畤遂幸安定

二年二月行幸螽屋五柞宮

螽屋扶風縣也有五柞樹因以名宮

宣帝神爵元年正月行幸甘泉郊泰畤三月行幸河東

祠后土

五鳳元年正月行幸甘泉郊泰畤

二年三月行幸雍祠五畤

三年三月行幸河東祠后土

甘露元年正月行幸甘泉郊泰畤

二年十二月行幸萑陽宮

在扶風郿縣秦文王所起萑音信

屬玉觀

屬玉

水鳥似鷓鴣以名觀也屬音之欲切

三年正月行幸甘泉郊泰畤

黃龍元年正月行幸甘泉郊泰畤

元帝初元二年正月行幸甘泉郊泰畤

四年正月行幸甘泉郊泰畤三月行幸河東祠后土

五年三月行幸雍祠五時

永光元年正月行幸甘泉郊泰時

四年三月行幸雍祠五時

五年正月行幸甘泉郊泰時三月幸河東祠后土冬幸

長楊射熊館

建昭元年三月行幸雍祠五時

二年正月行幸甘泉郊泰時三月幸河東祠后土

成帝鴻嘉元年二月行幸初陵帝始為微行出

永始四年正月行幸甘泉郊泰時三月行幸河東祠后

土帝乃帥羣臣橫大海湊汾陰既祭行遊介山回安邑

介山在汾陰東北回謂繞過

顧龍門監鹽池

龍門山在今蒲州龍門縣北鹽池在今虞州安

邑縣

登歷觀

歷山上有觀也在河東蒲阪縣

陟西嶽以望八荒迹殷周

之虛眇然以思唐虞之風

西岳華山之上高峻故言以望八荒殷都河內周都岐豐

堯都平陽舜都蒲阪皆可想見故云迹殷周之虛思唐虞之風也虛謂曰墟

元延元年三月行幸雍祠五時

二年正月行幸甘泉郊泰時三月行幸河東祠后土冬

行幸長楊宮從胡客大校獵宿萑陽宮

三年三月行幸雍祠五時

四年正月行幸甘泉郊泰時三月行幸河東祠后土

綏和元年三月行幸雍祠五時

二年正月行幸甘泉郊泰時三月行幸河東祠后土

後漢光武建武二年二月己酉幸修武

本殷之甯邑武王伐紂勒兵於此改

曰修武今懷州縣也

辛卯至自修武

三年十月壬申幸春陵祠園廟因置酒舊宅大會故人

父老

光武舊宅在今隨州棗陽縣東南宅南二里有白水馬

十一月乙未至自春陵

四年二月壬子幸懷壬申至自懷四月丁巳幸鄴巳巳

進幸臨平

屬鉅鹿

五月進幸元氏辛巳進幸盧奴六月辛

亥還宮七月丁亥幸譙八月戊午進幸壽春十月甲寅

還宮十一月丙申幸宛十二月丙寅進幸黎丘

五年正月癸巳還宮七月丁丑幸沛祠高廟進幸湖陵

縣名屬山陽

又幸蕃

音皮屬魯國

八月巳酉進幸郊

縣名屬東海

冬十

月還幸魯使大司空祠孔子又幸臨淄進幸劇是月還

宮

九年六月丙戌幸緱氏登輶轅

緱氏縣有緱氏山輶轅山有輶轅坂並各在雒

陽東

十年八月乙亥幸長安祠高廟有事十一陵戊戌進幸

沂

今隴州沂源縣

十月庚寅還宮

十一年二月己酉幸南陽還幸章陵祠園陵庚午還宮

十七年四月乙卯南巡狩皇太子及右翊公輔楚公英

東海公陽濟南公康東平公蒼從幸潁川進幸葉章陵

五月乙卯還宮

東觀記曰上以日食避正殿讀圖讖多御座廡下淺露中風發疾苦眩甚左右

有白大司馬史病苦如此不能動搖自強從公出乘車行數里病差四月二日車駕宿偃師病差數日入南陽界到葉以車騎省留數日行黎陽兵馬千餘匹遂到章陵起居平愈十月甲申幸章陵修

園廟祠舊宅觀田廬置酒作樂賞賜十二月至自章陵

十八年二月甲寅西巡狩幸長安三月壬午祠高廟遂

有事十一陵歷馮翊界進幸蒲坂祠后土四月甲戌還

宮戊申幸河內戊子至自河內十月庚辰幸宜城

今襄州縣

還祠章陵十二月乙丑還宮

十九年九月南巡狩壬申幸南陽進幸汝南南頓縣舍
又幸淮陽梁沛

二十年二月戊子還宮十月東巡狩甲午幸魯進幸東
海楚沛國壬寅還宮

二十二年閏正月丙戌幸長安祠高廟遂有事十一陵
二月己巳至自長安

三十年二月東巡狩甲子幸魯進幸濟南閏月癸丑還
宮七月丁酉幸魯國十一月丁酉至自魯

中和元年正月丁卯東巡狩二月己卯幸魯進幸泰山

事具帝王封禪門

四月癸酉還宮己卯行幸長安祀長陵五月

乙丑至自長安

明帝永平二年十月甲子西巡狩幸長安祠高廟遂有事十一陵十一月甲申進幸河東癸卯還宮

三年十月帝從太后幸章陵觀舊廬置酒會陰鄧故人諸家子孫並受賞賜十二月戊辰至自章陵

五年十月幸鄴常山三老言於帝曰上生於元氏願蒙

優復詔復田租更賦六歲勞賜掾吏及門閭走卒

六年十月行幸魯祠東海恭王陵會沛王輔楚王英濟
南王康東平王蒼淮南王延琅邪王京東海王政十二
月還幸陽城遣使者祠中嶽壬午還宮

十年閏四月甲午南巡狩幸南陽祠章陵日北至又祠
舊宅禮畢召校官弟子作雅樂奏鹿鳴帝自御塤箎和
之以娛嘉賓還幸南頓勞饗三老官屬至十二月甲午

還宮

十三年四月汴渠成辛巳幸滎陽巡河渠因渡河登太行進幸上黨壬寅還宮

十五年二月庚子東巡狩辛丑幸偃師進幸彭城癸亥耕于下邳三月徵琅邪王京會良城徵東平王蒼會陽都又徵廣陵侯及其三弟會魯祠東海恭王陵還幸孔子宅又幸東平辛卯進幸大梁至定陶祠恭王陵四月庚子還宮

章帝建初七年九月甲戌幸偃師東涉卷津至河內詔

曰車駕行秋稼觀收穫因涉郡界皆精騎輕行無他輜重不得輒修橋道遠離城郭遣吏逢迎刺探起居出入前後以為煩擾動務省約但患不能脫粟瓢飲耳所過欲令貧弱有利無違詔書遂覽淇園已酉進幸鄴勞賞魏郡守令已下至于三老門闌走卒賜錢各有差勞賜常山趙國史人復元氏租賦三歲辛卯還宮十月癸丑西巡狩幸長安丙辰祠高廟有事十一陵進幸槐里又幸長平御池陽宮東至高陵造舟于涇而還每所到幸

輒會郡縣吏人勞賜作樂十一月詔勞賜河東守令掾
以下十二月丁亥還宮

八年十二月甲午東巡狩幸陳留梁國淮陽潁陽戊申
還宮

元和元年八月丁酉南巡狩詔所經道上郡縣無得設
儲峙峙具也命司空自將徒支拄橋梁有遣使奉迎探知

起居二千石當坐其賜鰥寡孤獨不能自存者粟人五
斛九月辛丑幸章陵祠舊宅園廟見宗室故人賞賜各

有差冬十月己未進幸江陵詔廬江太守祠南嶽又詔
長沙零陵太守祠長沙定王舂陵節侯鬱林府君還幸
苑十一月己丑還宮

二年二月丙辰東巡狩乙丑耕于定陶辛未幸泰山

修光

武壇兆

柴告岱宗

事見帝王封禪門

進幸奉高壬申宗祀五帝

于孝武所作汶上明堂光武帝配如雒陽明堂祀癸酉
更告高祖太宗世宗中宗世祖顯宗于明堂各一太牢
卒事遂觀東后享賜王侯羣臣戊寅進幸濟南三月己

丑進幸魯祠東海恭王及孔子七十二弟子壬辰進幸
東平祠憲王陵乙未幸東阿北登太行山行至天井關
四月乙卯還宮

三年正月丙申北巡狩濟南王康中山王烏西平王羨
六安王恭樂成王黨淮陽王昞任城王尚沛王定皆從
辛丑耕於懷二月壬寅告常山魏郡清河鉅鹿平原東
平郡太守詔曰朕惟巡狩之制以宣聲教考同遐邇解
釋怨結也今四國無政不用其良駕言出遊欲親知其

劇易前祠園陵遂望祀華霍

華霍山名也今在廬江灑縣西南亦名天柱山爾雅

曰華山為西嶽霍山為南嶽

東柴岱宗為人祈福今將禮常山遂徂

北土歷魏郡經平原升踐隄防詢訪耆老咸曰往者汴

渠未作深者成淵淺則泥塗追惟先帝勤人之德

謂水平十

二年修汴渠

底績遠圖復禹弘業聖迹滂流至於海表不克

堂構朕甚慚焉月令孟春善相丘陵土地所宜今肥田尚多未有墾闢其悉以賦貧民給與糧種務盡地力勿令遊手所過縣邑聽半入今年田租以勸農夫之勞乙

丑勅侍御史曰方春所過無得有所伐殺車可以引避
引避之駢馬可輟解輟解之戊辰進幸中山癸酉還幸
元氏祠光武於縣舍正堂又祀明帝于始生堂三月己
卯進幸趙辛卯還宮八月己丑幸安邑觀鹽池

許慎云河東鹽

池袤五十一里廣七里周一
十六里今蒲州虞鄉縣西 九月至自安邑

章和元年八月癸酉南巡狩甲申徵任城王尚會睢陽
戊子幸梁己未幸沛九月庚子幸彭城東海王政沛王
定任城王尚皆從辛亥幸壽春己未幸汝陰冬十月丙

子還宮

和帝永元三年十月癸未行幸長安詔曰北狄破滅名

王仍降

仍頻也

西域諸國納質內附豈非祖宗迪哲重光

之鴻烈歟

迪蹈也言由祖宗蹈履明智有重光累聖之德成此大業書曰茲四人迪哲人曰宣重光

也

寤寐歎息想望舊京其賜行所過二千石長吏以下

及三老官屬錢帛各有差鰥寡孤獨篤癘貧不能自存者粟人三斛十一月癸卯祠高廟遂有事十一陵庚申至自長安

十三年正月丁丑幸東觀覽書林閱篇籍

十五年九月南巡狩清河王慶濟北王壽河間王開並
從賜所過二千石長吏以下三老官屬及民百年者錢
布各有差十月戊申幸章陵祠舊宅癸丑祠園廟會宗
室于舊廬勞賜作樂戊午進幸雲夢臨漢水而還

雲夢
今安

州十一月甲申還宮

十六年十一月乙丑行幸緱氏登百岨山

即栢邳山也
在雒州緱氏

縣南爾雅云山一成曰邳
東觀記作岨並平眉切

賜百官從臣布各有差

安帝建光元年九月戊子幸衛尉馮石府賜寶劔玉珎
雜繒布等

延光三年二月丙子東巡狩辛卯至泰山柴祭及祠汶
上明堂如元和二年故事勞賜郡縣作樂還幸東平歷
魏郡河內壬戌還京幸太學四月乙丑入宮假于祖禰
十月行幸長安丁亥會三輔守令掾吏于長安作樂閏
月乙未祠高廟有事十一陵歷觀上林昆明池十一月
乙丑至自長安

四年二月甲辰南巡狩三月幸宛

順帝永和二年十月甲申行幸長安所過鰥寡孤獨貧不能自存者賜粟人五斛庚子幸未央宮會三輔郡守都尉及官屬勞賜作樂十二月乙亥至自長安

四年十一月丙寅幸廣成苑

桓帝建和二年三月戊辰帝從皇太后幸大將軍冀府五月癸丑北宮掖庭中德陽殿及左掖門火帝移幸南宮

和平元年三月徙幸北宮

永興元年三月丁亥幸鴻池

二年十一月甲辰校獵上林苑遂至函谷關賜所過道
傍年九十以上錢各有差

延熹元年十月幸上林苑

二年十月壬申行幸長安乙酉幸未央宮甲午祠高廟
十一月庚子有事十一陵十二月己巳至自長安賜長
安民粟人十斛園陵人五斛行所過縣三斛

七年十月壬寅南巡狩庚申幸章陵祠舊宅戊辰幸雲

夢臨漢水還幸新野祠湖陽公主魯哀王舅壽張敬侯

廟光武姊湖陽長公主新野長公主兄魯哀王舅壽張敬侯樊重竝光武時立廟十二月辛丑

還宮

靈帝光和五年十月校獵上林苑歷函谷關巡狩于廣

成苑十二月還幸太學

獻帝初平元年二月遷都長安三月乙巳幸未央宮

四年十月太學行禮帝幸永福門臨觀其儀賜博士以

下各有差

建安元年七月甲子帝自長安至雒陽八月辛丑幸南

宮

魏文帝初為魏王延康元年六月庚午南征七月甲午
軍次于譙大享六軍及譙父老百姓於邑東八月丙午
行曲蠡受漢禪

黃初元年十二月幸雒陽

三年正月行幸許昌宮三月行幸襄邑四月行還許昌

宮十一月辛丑行幸宛

四年正月築南巡臺于宛三月丙申行自宛還雒陽宮
八月東巡九月行幸許昌宮

五年三月行自許昌還雒陽宮七月行東巡幸許昌宮
八月為水軍親御龍舟循蔡潁浮淮幸壽春揚州界將
吏士民犯五歲刑已下皆原除之九月遂至廣陵赦青徐
二州改易諸將守冬十月行還許昌宮

六年三月行幸台陵乙巳還許昌宮辛未帝為舟師東

征五月戊申幸譙帝遂以舟師自譙循渦入淮從陸道

幸徐九月築東巡臺十月行幸廣陵故城臨江觀兵戎

卒十餘萬旌旗數百里

魏書載帝于馬上為詩曰觀兵臨江水水流何湯湯戈矛成山

林玄甲曜日光猛將懷暴怒膽氣正縱橫誰云江水廣一葦可以航不戰屈敵虜戢兵稱賢良古公宅岐邑寶始翦殷商孟獻營虎牢鄭人懼稽顙充國務耕植先零自破亡興農淮西間築室都徐方量宜運權略六軍咸悅康豈如東山詩悠悠多憂傷

七年正月將幸許昌許昌城南門無故自壞帝心惡之

遂不入壬子行還雒陽宮

明帝大和二年正月辛未幸長安四月丁酉還雒陽宮
四年八月辛巳東巡過繁昌使執金吾臧霸行太尉事
特牛祠受禪壇乙未幸許昌宮十月還雒陽宮

六年三月癸酉行東巡所過存問高年鰥寡孤獨賜穀
帛四月壬寅行幸許昌宮九月行幸摩陂十二月行還
許昌宮

青龍元年二月丁酉幸摩陂觀龍于是改年改摩陂為
龍陂賜男子爵人二級鰥寡孤獨無出今年租賦

是年正月

青龍見邾之
摩陂井中

三年十一月丁酉行幸許昌宮

四年十月己卯行還雒陽宮十二月乙未行幸許昌宮

景初元年五月己巳還雒陽宮

初文帝值天下三分方
隅多事皇與丞動後無

寧歲蓋應時之務非舊章也明帝凡三軍巡狩所
過存問高年恤疾苦賜谷帛有古巡幸之風焉

齊王正始元年八月巡省雒陽界秋稼賜高年布各有

差

高貴鄉公甘露元年四月丙辰幸太學

事見帝王
文學門

二年五月辛未幸辟雍會羣臣賦詩

陳留王咸熙元年正月甲子行幸長安

晉成帝咸和五年十月丁丑幸司徒王導第置酒大會

咸康元年三月乙酉幸司徒府

後魏道武登國二年十月癸卯幸濡源十一月遂幸赤

城十有二月巡松漠還幸牛川

七年七月行幸漠南仍築巡臺

九年三月帝北巡五月田于河東七月還幸河南宮

十年五月幸鹽池宮六月幸河南宮

天興元年正月帝自中山行幸常山之真定次趙郡之高邑遂幸于鄴帝至鄴巡登臺榭遍覽宮城將有定都之意乃置行臺以龍驤將軍日南公和跋為尚書與左丞賈彞率郎吏及兵五千人鎮鄴帝自鄴還中山所過存問百姓詔大軍所經州郡復貲租一年除山東民賦租之半二月車駕至自中山幸繁峙宮

三年五月己巳東巡遂幸涿鹿西幸馬邑觀灑源七月

壬子還宮

六年九月行幸南平城規度南面夏屋山背黃瓜堆將
建新邑辛未還宮

天賜元年十有二月戊辰幸豺山宮

二年二月癸亥還宮

三年二月乙亥幸代園山建五石亭三月庚子還宮四
月庚申復幸豺山宮登定襄角火山又幸馬城甲午還
宮八月甲辰行幸豺山遂至青牛山丙辰西登武要北

原觀九十九泉造石亭遂之石漠九月甲戌朔幸漠南
鹽池渡漠北之吐鹽池癸巳南還長川丙申臨觀長陂
十月庚申還宮

四年五月北巡自參合陂東過蟠羊山大雨暴水流輜
重數百乘殺百餘人遂東北踰石漠至長川幸濡源七
月車駕自濡源西幸參合陂乃還宮八月幸豺山宮十
有一月還宮

五年正月行幸豺山宮遂如參合陂觀漁于延水至甯

川

明帝永興四年七月東巡己卯大獮于石會山戊子臨去畿陂觀漁庚寅至于濡源西巡幸北部諸落賜以繒帛八月庚戌還宮壬子幸西宮臨板殿大享羣臣將吏即以田獵所獲各賜之十二月北巡至長城而還

五年正月己卯幸西宮三月庚戌幸高柳川甲寅還宮四月乙卯西巡五月乙亥行幸雲中舊宮六月丙辛五原校獵于骨羅山獲獸十萬七月還幸登薄山帝觀宣

武遊幸刻石頌德之處乃於其旁起石壇而薦饗焉賜
從者大脯于山下丙戌自大室西南巡都部落賜其渠
帥繒布各有差遂南次定襄大落城東踰七嶺山田于
善無川八月癸卯還宮丁丑幸豺山宮癸未還宮

神瑞元年正月辛巳幸繁時賜王公已下至於士卒百
工布帛各有差二月戊戌還宮庚戌幸豺山宮五月辛
酉還宮六月戊申幸豺山宮丁亥還宮

二年四月北巡五月丁亥次于參合東幸大甯丁未田

於四岬山六月戊午幸去畿波觀漁辛酉次于濡源築
立蟬臺射白熊于頽牛山獲之丁卯幸赤城親見長老

問民疾苦復租一年南次石亭幸上谷問百年訪賢俊

復田租之半壬辰幸涿鹿登喬山

在上郡周陽縣

觀溫泉使使

者以太牢祠黃帝廟至廣甯登歷山

在蒲阪縣

祭舜廟七月

還宮復所過田租之半十月辛酉行幸沮洳城癸亥還

宮十一月丁亥幸豺山宮庚子還宮

泰常元年正月甲申行幸豺山宮戊子還宮六月丁巳

北巡七月甲申帝自繇鹿陂西行大獮于牛川登釜山
臨殷繁水而南觀于九十九泉戊戌還宮十月壬戌幸
豺山宮十一月甲戌還宮

二年四月丁巳幸高柳壬戌還宮五月西巡至于雲中
遂濟河田于大漠十二月壬申幸大甯長川

三年正月丁酉朔帝自長川詔護高車中郎將薛繁率
高車丁零十二部大人衆北略至弱水降者千餘人獲
牛馬二萬餘頭三月庚戌幸西宮五月東巡至濡源及

甘松七月乙酉西還戊午至于京師

四年四月辛巳南巡狩幸雁門賜所過無出今年租賦
五月庚寅朔觀漁于灑駕還復一年租賦八月辛未東
巡遣使祭恒岳甲申還宮復一年田租

五年正月丙戌朔自薛林東還至于屋竇城饗勞將士
大酺二日班禽獸以賜之己亥還宮六月丙寅行幸翳
犢山七月丁酉西至于五原丁未幸雲中大室賜從者
大酺八月癸亥還宮

六年正月辛未行幸公陽六月北巡至蟠羊山七月西
巡獵于祚山親射虎獲之遂至于河八月庚子大獮于
犢渚九月庚戌還宮十月己亥行幸代十有二月丙申
巡狩至于雲中

七年正月甲辰朔自雲中西巡行幸屋竇城賜從者大
酺三日賜蕃渠帥繒帛各有差二月丙戌還宮賜從者
布帛各有差九月幸灑南宮遂如廣甯辛亥幸橋山幽
州見其耆老問其所苦賜爵號十月甲戌還宮復所過

田租之半十月壬辰南巡出自天門闕踰恒嶺四方蕃

附大人各率所部從者五萬餘人

以奚斤伐滑臺不克南巡為其聲援故也

八年正月丙辰行幸鄴存恤民俗三月乙巳田于鄴南

歸韓陵山幸汲郡至于枋頭乙卯濟河而北西之河內

造浮橋于冶阪津閏月己未還幸河內北登太行幸高

都辛酉帝還宮晉陽班賜從官王公以下至于厮賤無

不霑給五月丙寅還次雁門皇太子率留臺王公迎于

句注之北庚寅至自南巡丙辰北巡至于參合陂遊于

蟠羊山七月幸三會屋侯泉皇太子率百官以從八月
幸馬邑觀于灑泉九月乙亥還宮

大武始光元年四月甲辰東巡幸大寧七月還宮

二年六月幸雲中舊宮謁陵廟西至五原田于陰山東
至于和兜山七月築馬射臺于長川帝親登臺觀走馬
王公諸國君長馳射中者賜金錦繒絮各有差八月還
宮

四年正月己亥行幸幽州赫連昌遣其弟平原公定率

兵二萬向長安帝聞之乃遣就陰山伐木大造攻具二月還宮十二月行幸中山守宰貪汙免者十數人癸亥還宮

神麩元年四月西巡六月甲寅行幸長川七月還宮八月東幸廣甯臨觀溫泉九月還宮十月甲辰北巡壬子田于牛川十二月甲申還宮

三年正月癸卯行幸廣甯臨溫泉作歌戊辰還宮四月甲子行幸雲中八月行幸南宮獵于南山九月甲申行

幸統萬遂征平涼十一月乙酉至平涼己亥帝幸安定
十二月壬申東還

四年正月壬午次于木根山大享羣臣賜布帛各有差
二月癸酉還宮飲至策勲告于宗廟賜留臺百官各有
差三月丁丑行幸南宮五月庚寅行幸雲中七月己酉
行幸河西起承華宮九月癸丑還宮

延和元年二月丙子行幸南宮

二年二月壬午行幸河西三月壬子還宮五月己亥行

幸山北十一月甲寅自山北還宮十二月辛未幸陰山之北

三年正月乙未次于女水大享羣臣班賜各有差二月辛卯還宮三月甲寅行幸河西巳卯還宮四月丁未行幸河西六月甲辰還宮十二月甲辰行幸雲中

太延元年二月丁未還宮五月甲戌行幸雲中八月丙戌遂幸河西九月甲戌還宮十月甲辰行幸定州次于新城宮十一月巳丑行幸冀州巳巳校獵于廣川丙子

行幸鄴祀宓太后廟諸所過對問高年褒禮賢俊

二年正月甲寅還宮十一月己酉行幸相陽閏月壬子
還宮

三年二月行幸幽州存恤孤老問民疾苦還幸上谷遂
至代所過復田租之半三月己卯還宮五月丙申行幸
雲中八月甲辰行幸河西九月甲申還宮十月癸卯行
幸雲中十一月壬申還宮

五年正月庚寅行幸定州三月辛未還宮

太平真君元年七月行幸陰山九月壬寅還宮

三年五月行幸陰山北十二月丁酉還宮

四年正月庚午行幸中山二月丙子次恒山之陽詔有

司刊石勒銘是月尅仇池三月庚申還宮

五年二月庚申行幸廬三月戊辰大會于邯南甲辰

還宮五月丁酉行幸陰山北九月帝自河西至于馬邑

觀于崞川己亥還宮丁未行幸漠南十二月丙戌還宮

六年正月辛亥行幸定州引見長老存問之二月遂西

幸上黨觀連理樹於汝氏至吐京討徙叛胡出配郡縣
三月庚申還宮六月壬辰北巡八月幸陰山北次于廣
德宮十一月辛未還宮癸未西巡

七年正月戊辰次東雍辛未南幸汾陰二月丙戌幸長
安存問父老丁亥次昆明池遂田于岐山之陽四月甲
申至自長安

八年二月癸未行幸中山五月還宮

九年二月癸卯行幸定州三月還宮六月辛酉行幸廣

德宮八月詔中外諸軍戒嚴丙戌幸陰山

十一年正月乙丑行幸雒陽所過郡國皆親對高年存恤孤老二月甲午大蒐于梁山車駕遂征懸瓠四月癸卯還宮賜從者及留臺郎吏已上生口各有差

正平元年七月行幸陰山九月還宮十月庚申行幸陰山十二月丁丑還宮

文成興安二年五月行幸崞山辛卯還宮七月辛亥行幸陰山己巳還宮十一月辛酉行幸信都中山觀察風

俗甲午還宮

興光元年六月丙寅行幸陰山八月乙亥還宮十一月
戊戌行幸中山遂幸信都十二月丙子還幸靈丘至温
泉宮庚辰還宮

太安元年七月丙辰幸河西八月丁亥還宮

二年八月甲申畋于河西十月甲申還宮

三年六月行幸陰山八月畋于陰山之北己亥還宮十
月將東巡詔太宰常英起行宮於遼西黃山

四年正月行幸廣寧溫泉宮遂東巡平州庚午至于遼
西黃山宮遊宴數日親對高年勞問疾苦二月丙子登
碣石山觀滄海大享羣臣於山下班賞進爵各有差改
碣石山為樂遊山築壇紀行於海濱戊寅南幸信都改
遊于廣川三月丁未觀馬射于中山所過郡國賜復一
年丙辰還宮七月丙午行幸河西九月己巳還宮十月
甲戌北巡至陰山有故塚毀廢詔曰昔姬文葬枯骨天
下歸仁自今有穿毀墳隴者斬之辛卯次于車輪山累

石記行

五年六月戊申行幸陰山八月庚戌遂幸雲中壬戌還宮

和平元年七月壬午行幸河西九月庚午還宮

二年三月幸中山至于鄴遂幸信都所過皆親對高年問民疾苦詔民八十以上一子不從役是月辛巳還宮
六月庚申上幸陰山巳巳還宮七月壬午行巡山北八月丁丑還宮

三年二月癸酉畋于崢山遂觀漁於旋鴻池七月壬寅
幸河西十一月壬寅還宮

四年四月癸亥上幸西苑親射虎三頭五月行幸陰山
九月辛巳還宮

五年六月丁亥行幸陰山七月壬寅行幸河西九月辛
丑還宮

六年二月丁丑行幸樓煩宮三月乙巳還宮

獻文皇帝興元年八月丁酉行幸武州山石窟寺

四年十二月甲辰幸鹿野苑石窟寺

五年六月丁未行幸河西七月丙寅遂至陰山八月丁亥還宮

孝文延興二年閏六月戊午行幸陰山

三年八月庚申太上皇帝並幸河西拾寅謝罪請降許之九月辛巳並還宮

五年五月丁未幸武州山辛酉幸車輪山

承明元年十月辛未幸建明佛寺大宥罪人

太和元年四月丁卯幸白登山壬申幸崢山

二年二月丁亥行幸代之湯泉所過問民疾苦癸卯還宮四月甲申幸崢山丁亥還宮六月己丑幸鹿野苑

三年二月辛巳帝與太皇太后幸代郡溫泉問民疾苦己亥還宮四月丙申幸崢山己亥還宮八月乙亥幸方山起思遠佛寺丁亥還宮

四年四月辛巳幸白登山五月丙申朔幸火山壬寅還宮七月辛亥幸火山八月甲辰幸方山戊申幸武州山

石窟寺庚戌還宮

五年正月己卯南巡丁亥至中山親見高年問民疾苦
二月丁酉幸信都存問如中山癸卯還中山三月辛酉
朔幸肆州

六年三月辛巳幸武州山石窟寺賜貧者衣食壬午幸
方山

七年四月庚子幸崢山賜所過鰥寡不能自存者衣服
粟帛壬寅還宮五月戊寅朔幸武州山石窟寺

八年四月甲寅幸方山戊午還宮庚申行幸旋鴻池遂
幸崢山丁卯還宮七月乙未幸方山石窟寺

九年四月癸丑幸方山甲寅還宮六月辛亥幸方山遂
幸靈泉池丁巳還宮七月戊子幸漁池登青原崗甲午
還宮八月己亥行幸彌澤甲寅登牛頭山甲子還宮

十年四月癸酉幸靈泉池戊寅還宮六月辛酉幸方山
十一年五月壬辰幸靈泉池遂幸方山甲午還宮

十二年四月乙丑幸靈泉池丁卯遂幸方山己巳還宮

七月己丑幸靈泉池遂幸方山己亥還宮閏九月辛未
幸靈泉池癸酉還宮

十三年四月丁亥幸靈泉池遂幸方山己丑還宮七月
丙寅幸靈泉池與羣臣御龍舟賦詩而罷

十四年正月乙丑行幸方山二月辛未行幸靈泉池壬
申還宮

七月丙午行幸方山丙辰遂幸靈泉池八月丙寅朔還
宮

十六年二月壬辰幸北部曹歷觀諸省巡京邑聽理冤
訟三月丁卯巡省京邑

十七年三月辛巳幸永興園徙御宣文堂八月戊申幸
并州親見高年問疾苦九月庚午幸雒陽周巡故宮基
址帝顧謂侍臣曰晉德不修早傾宗祀荒毀至此用傷
朕懷遂詠黍離之詩為之流涕十月己卯幸河南城乙
酉幸豫州癸巳次于石濟

十八年正月癸亥南巡乙亥幸雒陽西宮二月乙丑行

幸河陰規建方澤之所壬寅北巡癸卯濟河閏月癸亥
次句注陘南皇太子朝于蒲池壬申至平城宮癸酉臨
朝堂部分遷留七月壬辰北巡辛丑幸朔州八月甲辰
行幸陰山觀雲川丁未幸闕武臺臨觀講武癸丑幸懷
朔鎮己未幸武川鎮辛酉幸撫冥鎮甲子幸柔玄鎮乙
丑南還所過皆親見高年問民疾苦貧窘孤老賜以粟
帛戊辰次旋鴻池庚午謁永固陵辛未還平城宮十月
辛亥發平城宮壬戌次於中山之唐湖己巳幸信都十

一月丁丑幸鄴己丑至雒陽十二月辛亥南伐戊辰至
懸瓠

十九年二月甲辰幸八公山戊申巡淮而東丙辰至鍾
離將臨江水壬戌詔班師三月戊寅幸邵陽乙未幸下
邳四月庚子幸彭城癸丑幸小沛己未幸瑕丘戊辰幸
碭礪五月甲戌幸滑臺丙子次於石濟癸未至自南伐
九月丙戌行幸鄴乙未還宮

二十年八月戊戌幸嵩高甲寅還宮

二十一年正月乙巳北巡二月壬戌次太原癸酉至平
城癸未行幸雲中三月庚寅至自雲中乙未南巡巳酉
次離石丙辰次平陽四月庚申幸龍門癸亥幸蒲坂辛
未幸長安戊寅幸未央殿阿房宮遂幸昆明池

宣武景明三年九月行幸鄴閱武於鄴南十月還宮
四年八月行幸河南城離宮

正始元年十二月行幸伊闕

孝明孝昌二年八月帝幸南石窟寺即日還宮

出帝泰昌元年九月乙巳帝幸都水南過雒汭遂至澧
澗巳酉復田於北原

永熙二年正月巳亥幸嵩高石窟靈巖寺庚子又幸散
施各有差十二月丁巳狩于嵩陽巳巳遂幸温湯丁丑
還宮

三年二月辛巳幸洪池陂遂游田

冊府元龜卷一百十二

欽定四庫全書

子部
冊府元龜卷一百十三

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣王 瓚

謄錄監生臣史映綵

欽定四庫全書

冊府元龜卷一百十三

宋

王欽若等撰

帝王部

巡幸第二

後周明帝以閔帝元年九月即位

時未建
年紀

二年六月辛未幸昆明池九月丁未幸同州過故宅賦

詩曰玉燭調秋氣金輿歷舊宮還如過白水更似入新

豐霜潭清晚菊寒井落疎桐舉盃延故老令聞歌大風

十月辛酉還宮

武帝保定三年七月戊辰行幸原州丁丑幸津門問百
年賜錢帛又賜高年板職有差九月甲子自原州登隴
山丙戌幸同州十二月辛卯至自同州

四年十月丁卯幸沙苑勞師

時遣師
伐齊

癸酉還宮

五年二月壬申行幸岐州七月庚寅行幸秦州八月丙
子至自秦州

天和元年十一月丙戌行幸武功等新城十二月庚申

還宮

三年二月丁卯幸武功丁亥還宮五月庚申行幸醴泉
宮七月戊午至自醴泉宮十一月甲辰行幸岐陽十二
月丁丑至自岐陽

四年五月戊戌行幸醴泉宮七月辛亥至自醴泉宮

五年四月甲寅行幸醴泉宮七月乙卯至自醴泉宮

六年十一月丁巳行幸散關十二月己丑還宮

建德元年十一月庚戌行幸羌橋集京城以東諸軍都

督以上頒賜有差乙卯還宮十二月壬申行幸斜谷集
京城以西諸軍都督已上頒賜有差丙戌還宮

三年二月乙卯行幸雲陽宮三月辛酉至自雲陽宮七
月庚申行幸雲陽宮戊子至自雲陽宮八月丙申行幸
雲陽宮九月庚申幸同州十月甲寅行幸蒲州丙辰行
幸同州十一月己巳大閱于城東甲戌至自同州

四年正月癸酉行幸同州三月丙寅至自同州七月丙
辰行幸雲陽宮丁卯至自雲陽宮十月甲午行幸同州

十二月庚午至自同州

五年正月癸未行幸同州辛卯行幸河東涑川甲午還
同州三月壬寅至自同州四月乙卯行幸同州五月壬
辰至自同州六月丁巳行幸雲陽宮八月乙卯至自雲
陽宮

六年五月癸巳行幸雲陽宮六月丁未至自雲陽宮甲
子帝東巡七月丙戌行幸雒州十月戊申行幸鄴宮十
二月庚申行幸并州宮

宣政元年正月壬午行幸鄴宮辛卯行幸懷州置宮二月丁巳帝至自東巡

宣帝宣政元年六月即位八月壬申行幸同州十月癸酉至自同州

大象元年正月甲辰東巡狩戊午行幸雒陽二月乙亥行幸鄴辛巳詔傳位於太子自稱大元皇帝三月庚申至自東巡大陳軍伍帝親探甲冑入自青門皇帝衍備法駕從入百官迎于青門外其時驟雨儀衛失容自此以後

宣帝八月庚申行幸同州壬申還宮十一月乙未行幸
行辛

同州壬寅還宮十二月乙丑行幸雒陽帝親御驛馬日
行三百里四皇后及文武侍衛數百人並驛以從仍令
四后方駕齊驅或有先後便加譴責人馬頓仆相屬

二年二月辛卯行幸同州增候正前驅式道為三百六
十重自應門至於赤岸澤數十里間幡旗相蔽鼓樂俱
作又令武賁持鋌馬上稱警蹕以至同州

隋文帝開皇元年十月壬辰行幸岐州十二月庚子至

自岐州

二年正月癸丑幸上柱國王誼第庚申幸安成長公主
第二月辛卯幸趙國公獨孤陀第

三年六月乙未幸安成長公主第九月壬子幸城東觀
稼

四年二月庚戌幸隴州九月甲子幸襄國公主第乙丑
幸灞水觀漕渠賜督役者帛各有差甲戌以關內饑幸

雒陽

五年四月戊申至自雒陽八月己酉幸栗園九月丁巳
至自栗園

七年二月壬申幸醴泉宮四月己酉幸晉王第十月庚
申行幸同州以先帝所居降囚徒癸亥幸蒲州丙寅宴
父老上極歡曰此間人物衣服鮮麗容止閑雅良繇仕
宦之鄉陶染成俗也十一月甲午幸馮翊親祠故社父
老對詔失旨帝大怒免其縣官而去戊戌至自馮翊

八年十一月乙亥行幸定城陳師誓衆

時遣師
伐陳

丙子幸

河東十二月庚子至自河東

九年四月己亥幸驪山勞旋師也

十年二月庚申幸并州四月辛酉至自并州十一月辛

卯幸國學頒賜各有差

十一年八月壬申幸栗園乙亥至自栗園

十二年七月壬戌幸昆明池其日還宮八月乙亥幸龍

首池

十三年正月壬戌行幸岐州二月丁亥至自岐州七月

丁巳幸昆明池

十四年十二月乙未東巡狩

十五年正月壬戌次齊州親問疾苦三月己未至自東
巡狩丁亥幸仁壽宮九月至自仁壽宮十一月辛酉幸
溫湯乙丑至自溫湯

十六年十月己丑幸長春宮十一月壬子至自長春宮
十七年二月庚寅幸仁壽宮九月甲申至自仁壽宮

十八年二月甲辰幸仁壽宮九月辛卯至自仁壽宮十

二月自京師至仁壽宮置行宮十有二所

十九年二月甲寅幸仁壽宮

二十年九月丁未至自仁壽宮

仁壽二年三月己亥幸仁壽宮九月丙戌至自仁壽宮
四年正月甲子幸仁壽宮

煬帝以仁壽四年即位十一月乙未幸雒陽

大業元年八月壬寅帝御龍舟幸江都以左武侯大將
軍郭衍為前軍李景為後軍文武官五品已上給樓船

九品以上給黃篋舟舳艫相接二百餘里

二年三月庚午發江都四月庚戌帝自伊闕陳法駕備
千乘萬騎入于東京

三年三月辛亥自東京還京師四月庚辰詔曰古者帝
王觀風問俗皆所以憂勤兆庶安集遐荒自蕃夷內附
未遑親撫山東經亂湏加存恤今欲安輯河北巡省趙
魏所司依式丙申車駕北巡狩戊戌勅百司不得踐暴
禾稼其有湏開為路者有司計地所收即以近倉酬賜

務從優厚己亥次赤岸澤戊午發河北十餘郡丁男鑿太行山達于并州以通馳道六月戊子次榆林郡甲辰帝御北樓觀漁于河以宴百僚八月壬午車駕發榆林啓民可汗飾廬清道以候乘輿帝幸其帳啓民奉觴上壽宴賜極厚皇后亦幸義成公主帳癸巳入樓煩關壬寅次太原營晉陽宮九月乙未次濟源幸御史大夫張衡宅宴享極歡己巳至于東都

四年三月己亥幸大原因出塞巡長城八月辛酉親祀

恒岳河北道牧守畢集大赦天下凡經縣免一年租調
五年正月帝自東都還京師二月戊戌次闕鄉詔祭古
帝王陵及開皇功臣墓戊申至京師三月己巳西巡河
右乙亥幸扶風舊宅四月癸亥出臨關渡黃河至西平
陳兵講武五月庚辰入長寧谷度星嶺甲申宴羣臣於
金山之上丙戌梁浩壘

上音閣下
音門水名

御馬渡而橋壞斬朝

散大夫黃亘及督後者九人六月癸卯經大斗拔谷山路
隘險魚貫而出風霰晦冥與從官相失士卒凍死者大

半丙午次張掖丙辰御觀風行殿盛陳文物奏九部樂
設魚龍曼延宴高昌王吐屯設於殿上以寵異之蠻夷
陪列者三十餘國九月入長安十一月丙子幸東都
六年二月癸亥幸江都宮

七年二月己未升釣臺臨揚子津大宴百寮乙亥自江
都御龍舟入通濟渠遂幸涿郡詔征高麗四月庚午至
涿郡之臨朔宮

八年正月辛巳大軍集于涿郡三月辛巳御師戊子臨

戎于遼水甲午渡遼

自此以後事迹具帝王親征門

七月軍敗班師九

月庚寅至東都

九年三月戊寅幸遼東以越王侗民部尚書樊子蓋留守東都四月庚午車駕度遼六月庚午以楊玄感反于黎陽遂班師閏九月己巳幸博陵庚午謂侍臣曰朕昔從先朝周旋于此年甫八歲日月不居倏經三紀追惟平昔不可復希言未卒流涕嗚咽侍衛者皆泣下霑襟十年二月詔親征高麗三月壬子行幸涿郡癸亥次臨

渝宮甲午次北平七月癸丑次懷遠鎮甲子高麗遣使
降帝大悅八月己巳班師十月丁卯至東都已丑還京
師十二月壬申如東都戊子入東都

十一年三月幸太原避暑汾陽宮八月乙卯巡北塞戊
辰突厥始畢可汗率騎數十萬謀襲乘輿義成公主遣
使告變壬申馳幸鴈門癸酉突厥圍城官軍頻戰不利
帝大懼欲潰圍而出民部尚書樊子蓋固諫乃止九月
甲辰突厥解圍而去十月壬戌至于東都

十二年七月甲子幸江都宮以越王侗光祿大夫段達
太府卿元文都檢校民部尚書韋津右武衛將軍皇甫
無逸右司郎盧楚等總留後事奉信郎崔民象以盜賊
充斥於建國門上表諫不宜巡幸帝大怒先解其頤乃
斬之已巳車駕次泚奉信郎王愛仁諫帝請還西京又
斬之而行

唐高祖武德元年十二月乙酉幸周氏陂過故庄置酒
高會極歡而罷丁亥至自周氏陂

二年十月乙卯以秦王世民東伐王世充車駕幸華陰
送出師也

三年正月癸巳至自華陰二月庚子幸華陰四月壬寅
至自華陰六月癸丑幸昆明池

四年正月乙酉幸山堰即日還宮閏十月乙卯幸稷州
己未次于武功舊在庚申召父老故吏男女數百人置
酒高會賜帛有差辛未幸周氏陂壬申還京師

六年二月庚戌幸溫湯甲寅至自溫湯三月乙未幸昆

明池宴從官極歡而罷四月乙未幸故宅改名通義宮
祭元皇帝于舊寢以貞皇后配享高祖哽咽悲不自勝
侍衛莫不獻欷於是置酒高會賜從臣帛有差十月乙
未幸華陰十一月迎勞秦王於志武頓十二月甲寅至
自華陰

七年正月庚子幸月陂六月辛丑幸仁智宮戊申幸秦
王第七月甲午至自仁智宮壬子幸東宮宴從官下至
胥徒頒賜有差甲寅幸齊王元吉第十月丁卯幸慶善

宮癸酉幸終南丙子幸樓觀謁老子廟十二月丁卯幸
躍龍宮庚午至自慶善宮

八年正月甲寅幸秦王第謂羣臣曰朕以秦王有大功
於宮中立第以異之焉甲子幸月陂六月庚子幸太和
宮七月丙子至自太和宮十月辛巳幸周氏陂壬午幸
躍龍宮十一月辛卯幸宜州十二月辛酉至自宜州

九年正月巳未幸月陂三月丙午幸周氏陂乙卯至自
周氏陂

太宗貞觀四年二月己亥幸溫湯丙午至自溫湯九月
乙卯幸隴州十一月甲子至自隴州

五年十二月壬寅幸溫湯戊申至自溫湯

六年三月戊辰幸九成宮發使存問高年鰥寡十月
乙卯至自九成宮

七年五月癸未幸九成宮十月庚申至自九成宮十一
月甲寅幸芙蓉園

八年三月庚辰幸九成宮十月甲子至自九成宮

十一年二月甲子幸雒陽宮三月戊子引五品以上射於儀鸞殿庚子宴三品以上於西苑帝御龍舟沈於積翠池六月丁巳幸明德宮十一月辛卯幸懷州丙午還雒陽

十二年二月癸亥自雒陽幸河北縣觀砥柱因勒銘于其上以陳盛德庚午幸蒲州甲戌幸長春宮閏二月丁未至自雒陽宮

十三年四月辛九成宮十一月甲申至自九成宮

十四年二月壬午幸温湯辛卯至自温湯

十五年正月辛巳如雒陽次温湯衛士崔御刁文懿憚於行後冀鑾輿驚擾而停遂夜射行宮矢及寢院者五皆以大逆論已丑詔從行士卒家貧親老者並放還二月癸丑宴從官及山東宗姓雒陽年高於貞觀殿三月戊辰如襄城宮庚午發襄成宮分賜百姓十月壬辰幸嵩陽辛丑還宮十一月壬申還京十二月戊子至自雒陽

陽

十六年十一月丙辰西狩於武功甲子幸慶善宮庚午
還宮十二月癸卯行幸溫湯乙巳還宮

十七年十月壬戌幸芙蓉園十二月庚申幸溫湯庚午
還宮

十八年正月乙未幸鍾官城庚子幸鄠縣壬寅幸溫湯
二月巳酉幸靈口村落偏側問其受田丁三十畝遂夜
分而寢憂其不給詔雍州錄尤少田者並給復移之於
寬鄉乙卯還宮四月辛亥幸九成宮壬子次太平宮八

月甲子至自九成宮十月甲寅幸雒陽宮十一月壬申
至雒陽宮戊寅親錄囚徒多所降免庚辰遣使齎璽書
詣鄭汝懷澤四州巡問高年宴賜各有差壬午宴父老
一百九十人於儀鑾殿班賜有差是月征遼之兵大聚
於幽州帝將親征

十九年二月庚戌發雒陽宮辛亥次河陽女子呂年百
七十歲太宗幸其宅存問之癸丑次綏德太宗將飛騎
歷北山行遇猛虎引弓射之應弦而殪戊午次汲縣女

子翟張並年百歲太宗幸其宅存問之壬戌次安陽癸亥次於鄴三月壬申次平棘幸張道鴻之廬賜以衣服禮高年也道鴻餌金膏時一百四十六歲丁丑幸定州壬辰發定州四月丁未發幽州丁巳次北平登臨海戌降望大壑五月庚午次遼澤壬申渡澤丁丑渡遼六月丁未發遼東丙辰次安市城九月癸未太宗以季秋草枯遼寒冽即命班師自發幽州後督職納降事迹並見帝王親征門十月丙申次蒲溝丙午次營州丙辰次圍山戊午次漢武臺十一

月辛未次幽州庚辰次易州丙戌幸定州壬辰發定州
戊戌幸并州

二十年二月乙未幸并州三月巳巳至自遼東八月巳
巳幸靈州壬申幸漢故甘泉宮庚辰至涇州丙戌踰隴
山闕次西瓦亭十一月丙戌至自靈州

二十一年五月戊子幸翠微宮七月庚戌還宮

二十二年正月戊戌幸溫湯癸卯御製溫湯碑以示羣
臣戊申還宮二月乙亥行幸玉華宮三月丙戌至玉華

宮

高宗永徽四年十月庚子幸温湯乙巳至自温湯

五年二月戊午幸萬年宮乙丑次鳳泉幸温湯己巳至
萬年宮辛未詔曰朕躬膺寶命嗣奉瑤圖居萬乘之尊
當四海之貴遐觀往烈詳求前古每希蹤於哲后嘗勞
心于庶物兢懼弗寧憂勤若厲屬天下無事區宇有截
仰高風於汾射暫清暑於林泉朕昔在震宮侍遊茲壤
山川如舊歲月不追今既俗阜年和華夷胥悅緬懷徽

範情兼感慰宜遵省方之義且順陽和之序曲申惠澤
式彰寬宥行幸所經諸縣及岐州囚徒行人犯罪者流
降徒徒以下並免之

顯慶二年閏正月壬寅發京師二月辛酉入雒陽宮五
月丙申幸明德宮以避暑七月丁亥還雒陽宮十月戊
戌幸許州十一月乙卯還雒陽宮

三年二月丁巳發東都還京師甲戌至自東都

四年閏十月戊寅發京師幸東都戊戌至自東都

五年正月甲子發東都幸并州詔所經州縣供頓務從
儉約己巳至澤州之長平頓二月辛巳至并州三月甲
寅幸童子寺賦詩而還四月戊寅發并州癸巳至東都
五月壬戌幸合璧宮六月甲午還東都十一月甲寅發
東都幸許州十二月己卯至東都

龍朔元年三月壬戌幸合璧宮七月癸卯還東都九月
甲辰幸河南縣婦人張氏第張年一百三歲嘉其老也
又幸李勣第歎其服用儉素恩賜極厚是日又幸天宮

寺高祖龍潛第也又至許園師第癸酉還宮

二年三月甲午發東都還京師乙巳幸河北辛亥幸蒲
州夏四月庚申朔至京師十月丁酉駕幸溫湯皇太子
監國丁未至自溫湯

麟德元年二月戊子發京師幸福陽宮癸卯至萬年宮
八月丙子至自萬年宮便幸舊宅停七日壬午還蓬萊
宮

二年二月壬午自京師幸東都閏三月壬申朔至自東

都十月丁卯發東都赴東岳十一月己卯至滎陽丁亥
至衛南幸司空李勣舊居之宅戊子至濮陽十二月至
齊州停十日丙辰發靈巖頓至于泰岳之下

乾封元年正月戊辰朔有事於泰山

事具帝王
封禪門

丙戌發

自泰山甲午次曲阜縣二月己未次亳州謁老君廟三月丁
丑至東都甲申發東都還京師辛合璧宮四月甲辰還

京師

總章元年三月戊寅幸九成宮八月癸酉至自九成宮

二年四月乙酉朔幸九成宮九月己亥發自九成宮還
京師十月丁巳至自九成宮

咸亨元年四月庚午幸九成宮八月丁巳還京師九月
丁丑以京師久旱詔來年正月幸東都在路供頓所須
並令司稼自供不得令州縣差科所經道路修理開拓
水可涉渡不煩造橋築宮又擬置御營之驛並不敢擅
加修補在路不得妄有進獻

二年正月甲子至東都十一月庚戌發東都幸許汝等

州十二月丙戌還東都

三年四月戊寅幸合璧宮十月壬戌發東都還京師十一月甲辰至京師

四年四月丙子發京師幸九成宮十月庚子發九成宮乙巳至京師

上元元年十月丙午朔發京師幸東都戊申至東都

三年二月丁亥發東都幸汝州之温湯三月甲辰發温湯還東都閏月庚寅發東都還京師四月幸九成宮十

月還京師

儀鳳二年正月庚辰幸司竹園即日還宮

三年五月壬戌發京師幸九成宮丙戌至自九成宮是日山中霖雨大寒行從兵士有凍死者各賜絹三疋給棺槨官為埋殯又九月丁巳車駕發九成宮辛酉至京師十月詔曰咸京天府地隘人繁百役所歸五方胥萃雖獲登秋之積猶虧游歲之資眷言于此思蠲徭賦夫以交風輿壤測景神州職貢所均水陸輻輳今茲豐熟

特倍常時事貴從宜寔惟權道即以來年正月幸東都
關內百姓宜免一年庸調及租并地子稅草其當道諸
縣特免二年劍南隴右諸軍每供進物一二年且停

調露元年正月己酉幸東都

永隆元年二月癸丑發東都幸汝州之温湯丁巳至少
室山戊午帝親謁少姨廟又幸嶽山東閒居寺及隱士
田遊巖所居己未幸嵩陽觀及啓母廟並命樹碑又幸
道士潘師正所居之谷甲子發温湯乙丑至東都四月

乙丑幸紫桂宮八月乙巳發紫桂宮丁未至東都十月
巳酉發東都還京師

永淳元年四月丙寅發京師幸東都皇太子於京師監
國劉仁範裴炎薛元超等並留輔皇太子以關中穀貴
遽出詔東幸扈從兵馬特令減數其百官欲將家口往
東都者官為出船任於渭漕東下時士庶皆怨遽出關
在路有餓死者戊寅至澗池之紫桂宮乙酉至東都
二年正月甲午朔發東都庚子至奉天宮四月巳巳還

東都五月庚寅幸芳桂宮至合璧宮屬大雨却還東都
九月癸亥幸奉天宮十一月丁未自奉天宮至東都文
武百官見於天津橋南路左

中宗神龍元年八月丁丑御維城南門以觀鬪象十月
癸亥幸龍門香山寺乙丑幸新安畋遊而還十一月己
丑御維城門樓觀潑胡王戲

景隆二年二月辛未幸左金吾大將軍陸頌宅九月丁
卯幸慈恩寺十二月甲寅幸漢故未央宮舊基引從臣

賜宴有羣鹿經於御前羽林騎士獲之以獻帝皆命放之

三年正月癸酉幸薦福寺乙亥宴侍臣及近親於梨園亭十二月甲子幸新豐之温湯庚子幸兵部韋嗣立莊舍宴賜甚厚特封谷為幽栖谷是月幸驪山乙巳至自温湯

四年正月己卯幸始平縣送金城公主出降吐蕃二月癸未至自金城縣三月甲寅幸臨渭亭被襖是日還宮

玄宗先天元年十一月睿宗命帝巡邊詰曰先王省方所以觀風設教聖人順動所以刑清眚服故協時同律虞典之常道喬嶽翁河周詩之盛德自王風不競茲禮遂亡兩漢本朝有時于邁三國以降日不暇給我皇家開元首出十代重光寰宇大寧車書無外文祖神宗之德洽于人心考祥展義之規昭於國典朕祇若丕構寅奉慶靈夙懷箕頽之心耿遂汾陽之志皇帝天錫英武神與聰明純孝極於安親大功深於濟代自陟元后實

總朕師時政益明彞倫攸敘而邊氓遐阻藩服悠曠式
憫來蘇之懷寔允卜征之意加以頃年邊將授任或乖
師旅以虧軍威不振今盛德在水玄冥御辰天道成於
積陰王制崇於大閱皇帝宜順時巡狩親幸邊陲掌圖
修考事之儀典樂具陳詩之禮西泊河塞東踰燕朔望
秩名山肆覲羣后休農問老誓師訓卒其有牧州典郡
功施於人杖節擁旄隱若敵國者當崇進律之賞加以
分麾之命若郡政不舉軍令莫修聚斂苛細侵削戰士

者宜明茲典憲肅以天誅然後七萃騰裝三軍按節合符釜山之典覽軒帝之餘風勒騎單于之臺踐漢皇之故事使陰山罷祲大漠無塵其供帳所資儲擬之費皆令有司支備不得煩人甲午帝以北巡之故慎選良將乃以幽州防禦使幽州都督宋璟為左軍大總管和戎等軍大使并州長史薛訥為中軍大總管朔方大總管兵部尚書郭元振為右軍大總管既而竟不行

二年八月癸卯制曰咸維京師建都惟舊乃眷時邁卜

御斯在朕承天纂厯恭已臨人鼎俎雖甘念疲疇之不
足宮室信美惕浮戶之未安事內攢於千慮心外周於
萬物則知帝業初起崤函乃金湯之地天下大定河雒
為會同之府周公測景寔曰土中總六氣之所交均萬
方之來貢引魚鹽於淮海通稅紆於吳越瞻彼雒汭長
無阻饑自中宗入關於今八載省方之典久而莫修遂
使水漕陸輓方春不息勞人奪農卒歲何望關東嗟怨
朕實聞焉思欲寧人而休轉運館穀而就教庾如以暑

雨作害災拂秦川歲星有福祥歸豫野朕情深救弊身
豈懷安博考靈心審聽輿語上奉天以為孝下利人以
為忠順時而動從衆之願宜以今年十一月行幸東都
凡厥有司各恭乃事至於行從兵馬供頓貯積務在樽
節勿使煩勞考使選人咸令都集東都宮殿須理量加
補葺不得煩人朕本為人而行非擬勞人自奉所過州
縣無費黎元亦不得輒有差科旁求進獻宣布遐邇知
朕意焉十月己亥幸新豐之温湯乙巳至自温湯

開元二年九月戊申幸新豐之温湯十一月甲辰勅曰
惟此新豐是出古之順豫義兼巡省頃者觀風數臨茲
地以寃滯詢于故老閭里歡康田疇墾闢况冬降積雪
春期有年夏諺王遊果符時邁雖千乘萬騎咸給於主
司而累月再來頗勤於除掃宜下復蠲之令愒其望幸
之心新豐縣百姓免一年雜差科縣官及温泉監官經
兩度祇承者與一中上考

三年十月癸亥幸郿縣之鳳泉湯甲戌制曰詩人賦田

以備蒐狩之義王者順時式展畋遊之禮頃者築塲神
甸清道子來經上林之苑圍指扶風之藪澤雖獵將提
鼓虞人植旗仍憫沍寒之節不行肅殺之命豈惟虞舜
之典咸秩山川所冀周文之風及於鳥獸繇是罷還士
卒非重盤遊養彼吏人致有煩擾所謂行者幸也后來
其蘇宜申恩惠用符古者所經州縣供承頓官百姓并
告營幕橋道等事宜令所司勘會奏聞其緣御路及頓
場麥苗有損者亦令具實奏聞十一月乙卯至鳳泉湯

是月詔曰陳詩展義問俗觀風乃王者之所務也頃屬
農事皆隙歲功有成近歷艷鎬左連岐雍見江山秀麗
溝塍綺錯長楊鄠杜之間竹林果園之富相望於道家
給人足謂之時邁頗慰予懷思所以問耆老恤淹滯舉
逸人旌賢士庶協巡遊之典以符行在之恩駕所過之
縣見禁囚徒以下咸宜放免流以上罪具犯狀奏聽進
止古者親問高年存養孤老其年九十以上并篤疾各賜
物四段綿布各一屯

四年二月甲辰幸溫泉湯丁卯至自溫泉湯十二月乙卯幸新豐之溫湯乙丑至自溫湯是月帝將幸東都以京兆尹蕭瑒充置頓戶部侍郎崔岐為副太常少卿崔子環充橋道使自華州東北趨同州於渭水造一浮橋五年正月辛亥幸東都庚申勅曰行幸所經州宜令紕微令黃門平章事蘇瓌訪察刺史上佐政術定作三等奏聞二月甲戌至東都

六年七月辛酉詔曰觀俗省方所以愛人治國崇尊廟

貌所以事神享親欽若昔典此惟大義朕祗膺鴻業積
稔歲泰去歲欲幸雒京已發成命旋屬重營太廟因將
中止未即展輦効駕信弗可違終肆覲於東方當載馳
於西土流晷不駐通喪永畢象居始成如在增慕朕之
前志日夜匪遑故可以詩陳肅雍禮極禋祀况神明之
隩時惟雍州稼穡有年莫若闕輔王假用吉后来其蘇
實獲我心俾從人欲可以今年十月取北路幸長安所
司准式務在節省無得勞費甲寅復詔曰兩京來去乃

是尋常緣頓所須皆用官物至於百姓縱暫祇承處置有條不合辛苦其中侵擾莫非橫干或漁獵畜養以將進獻驅使役徒以徇聲名實由綱紀未樹教令不行去年從京向都嘗亦處分蒲州刺史程行謨同州刺史李朝隱陝州姜師度至其州界咸有進奉惜其能善政故乃屈法收情憶至於今豈能無恠中冬西幸不可踵前其有輒進送及餉遺從官并別有煩擾者必科以法御史明加糾察隨事奏聞九月辛卯以將作大匠韋溱為東

都留守十月甲寅還京十一月辛未至自東都

七年十月辛卯幸新豐之温湯癸卯至自温湯

八年十月辛巳幸長春宮壬午畋於華州之下邽庚寅
遂幸温泉十一月乙丑至自長春宮

九年正月丙寅幸新豐之温湯乙亥至自温湯九月甲
戌詔曰王者觀俗以賦政考祥以省方必將協于人和
而奉若天命朕祗承鴻業用康黎庶思振德以惠物豈
勞人以尊已頃年闕輔之地轉輸實煩重以河塞之役

兵戎屢動千金有費九載未儲懷此勞軫以增旰昃且夫苟利於物可隨方而變通將適於人故因時以巡幸卜雒萬方之隩維嵩五嶽之中風雨之所交舟車之所會流通江汴之漕控引河淇之運利俗阜財於是乎在今欲省其費務以實關中即彼教庾少留河邑乘歲陽之吉展遊順之儀豈惟龜筮不違故亦詢謀是協修五禮問百年車輿動而不勞玉帛會而胥悅所謂先天以弘道因人以為利也宜以明年正月十五日幸東都十

二月乙酉幸新豐之温湯壬辰至自温湯

十年正月丁巳幸東都二月戊寅至東都八月壬子制
曰朕頃自鎬京省方於雒本以息轉輸之費即河漕之
殷今屬宗廟改修禮崇昭事永言配享必在躬親又眷
彼晉陽是稱重鎮將陳詩以問俗式安邊而訓武雖來
徃祇供頗有煩役而國之大事不可云勞宜以明年正
月三日發雒幸并州取便路還京應湏支計所留准式
緣頓祇承一事已上並用當處官物不許科歛百姓其

逆運及從兵馬官寮等務從減省所在公私并不得輒有進獻違者所由州縣官及進獻人各量事貶罰布告遐邇咸使聞知

十一年正月己巳發東都北巡狩庚辰幸潞州二月辛未歸京師十月丁酉幸新豐之温湯置温泉宮甲寅至温泉宮十二月甲午幸鳳泉湯詔有司萬事自備不得干擾百姓戊申至自鳳泉湯

十二年十一月庚午幸東都戊寅至東都

十三年二月戊午幸龍門即日還宮十月辛酉帝發東
都巡狩十一月丙戌至泰山之下去山趾五里己丑日
南至帝與宰臣及外壇行事之官登于嶽上齊宮之所
庚寅祀昊天上帝于山上辛卯祀皇地祇于社首之泰
拆壇事見帝王
封禪門丙申幸孔子宅親設奠祭十二月己巳
至東都

十四年十月庚申幸汝州之温湯辛酉至温湯之行宮
時屬雨雪帝親賦喜雪詩以示羣臣己巳至自汝州之

溫湯十一月丁巳幸寧王憲宅與諸王宴探韻賦詩即日還宮十二月巳丑幸壽安安定方秀州時狩故也

十五年六月乙巳西京父老詣闕上表請幸帝手詔許之甲寅制曰朕粵自鎬鄴省方瀝雒屬九服寧晏四時順成殊徵龐啟景福紛委遂荷靈暎登于介丘先天成功允答休祐蓋敬天知命不敢以寧也我來于東歲亦數稔而西土耆老僕予多怨况闕輔之地頃則有年宜叶卜征之祥式展時巡之義可以今年閏九月十日取

北路幸長安所司准式緣頓支供一事已上並用當處
官物不須科斂百姓其遞運及行從官寮等物從減省
所在公私不得輒有進獻宣布遐邇知朕意焉七月戊
戌幸寧王之第是日憲誕辰也八月己巳制曰朕君臨
區宇子育黎元每懷勤恤不欲勞煩而鎬京之地陵寢
所在自展義河雒已歷歲年所以式遵卜征有事時邁
抑惟常典寧敢憚勞將欲西巡元取北路今同州有暴
水浸于邑居載懷憂惕無忘鑒寐且從南路幸長安所

司准式閏九月庚申發東都幸京師十月己卯至京師
十一月丙寅幸寧王憲之第

十六年十月己卯幸溫泉宮乙丑至自溫泉宮十二月
戊申幸寧王第留宿丁卯幸溫泉宮

十七年十二月辛酉幸溫泉宮壬申至自溫泉宮

十八年四月乙巳幸溫泉宮丁未至自溫泉宮壬戌幸
寧親公主第七月庚辰幸寧王憲第八月辛亥幸水穆
公主宅十月庚寅幸岐州之鳳泉湯癸卯至自鳳泉湯

十一月丁卯幸新豐溫泉湯

十九年六月丁卯制曰三秦九雜咸曰帝京五載一巡
時惟邦典上朕多饒衍之美仍勞於轉輸中壤均舟車
之湊頗聞於殷積朕所以相時度宜期于利物者也況
河汴頻稔江淮屢登二周馳望幸之誠三川勤僭予之
請然猶未便順動且念人勞期以來年方議時邁而頃
京輔近甸膏澤未均陝雒之交稼穡亦盛固不可俟於
今日庶用協乎光天豈肆心於宴安期順人而從幸兩

京供帳宿有儲擬十月滌塲是因暇隙信可備法駕整
勾陳清蹕靖潼觀風河雒宜以今年十月四日幸東都
所司准式十月丙申幸東都勅供頓州縣百姓所緣料
及克木匠雜祇供人等宜放今年地租自餘戶等免今
年地稅半應定供頓縣官各與一中上考庚辰至東都
二十年七月甲辰制曰昔之握皇綱執大象者或省方
以肆覲或巡狩以觀風故軒轅至崆峒之野夏禹列塗
山之會雖往古遺事先王高迹觀其出豫稍涉遐遠朕

自臨馭天下底綏人極法駕罕順動之儀蒼生多僖來
之歎每欲時邁因而布和憚于人勞必也中止惟彼堯
俗古風猶遽方於譙郡王業是同西漢高皇永懷于沛
邑東京數帝每幸於春陵豈不遠思喬木無忘敬梓况
境乃近壤城惟列都既行幸是嘗亦情禮兼遂又嵩郡
天險方位土中而陵寢地遥攀望增感且布政而行化
實展懷於志思宜取今年十月十二日幸北都便還西
京所司准式十月壬午駕發東都北巡辛丑至北都庚

申祀后土於睢上十二月辛未至京師

二十一年正月丁巳幸溫泉宮丁亥還京十月庚戌幸溫泉宮己未還京

二十二年正月己巳幸東都已丑至東都

二十三年十月詔曰朕所時邁皆狗物情屬闕輔無年遽爾東顧幸非為己將以息人今百穀既登庶事皆省而五陵所奉誠在京師安可更留周南有關時薦宜以來年正月七日取南路幸西京所司准式緣行幸所須

務從節減所司明為條例勿使勞煩

二十四年正月勅以前議西幸屬歲不登關輔之間且欲無擾今稼漸熟漕運復多而陵寢久違蒸嘗永感農隙順動得非其時前取今年十月幸西京者以其月三日發東都取南路應緣頓所要務從節減所司明為條例勿有煩勞十月戊申發東都幸京師甲子至陝州丁亥至京

二十五年十一月壬申幸溫泉宮乙酉至自溫泉宮十

二月戊午幸寧王宅

二十六年五月庚寅幸咸宜公主宅十月戊寅幸溫泉宮庚辰至自溫泉宮

二十七年十月甲戌幸溫泉宮十一月辛丑至自溫泉宮

二十八年正月癸巳幸溫泉宮庚子至自溫泉宮十月甲子幸溫泉宮辛巳至自溫泉宮

二十九年正月癸亥幸溫泉宮庚子至自溫泉宮十月

丙申幸溫泉宮十一月辛酉至自溫泉宮

冊府元龜卷一百十三